

【參考】

飲酒 東晉·陶潛

其一

衰榮無定在，彼此更共之。  
邵生瓜田中，寧似東陵時。  
寒暑有代謝，人道每如茲。  
達人解其會，逝將不復疑。  
忽與一觴酒，日夕歡相持。

其十一

顏生稱為仁，榮公言有道。  
屢空不獲年，長飢至於老。  
雖畱身後名，一生亦枯槁。  
死去何所知，稱心固為好。  
客養千金軀，臨化消其寶。  
裸葬何必惡，人當解意表。

其十二

長公會一仕，壯節忽失時。  
杜門不復出，終身與世辭。  
仲理歸大澤，高風始在茲。  
一往便當已，何為復狐疑。  
去去當奚道，世俗久相欺。  
擺落悠悠談，請從余所之。

其十五

貧居乏人工，灌木荒余宅。  
班班有翔鳥，寂寂無行迹。  
宇宙一何悠，人生少至百。  
歲月相催逼，鬢邊早已白。  
若不委窮達，素抱深可惜。

和陶飲酒 北宋 蘇軾

其一

我不如陶生，世事纏綿之。  
雲何得一適，亦有如生時。  
寸田无荆棘，佳處正在茲。  
縱心與事往，所遇无復疑。  
偶得酒中趣，空杯亦常持。

其十一

民勞吏无德，歲美天有道。  
暑雨避麥秋，溫風送蠶老。  
三咽初有聞，一溉未濡槁。  
詔書寬勦缺，父老顏色好。  
再拜賀吾君，獲此不貪寶。  
頽然笑阮籍，醉几書謝表。

其十二

我夢入小學，自謂總角時。  
不記有白發，猶誦論語辭。  
人間本兒戲，顛倒略似茲。  
惟有醉時真，空洞了无疑。  
墜車終无傷，莊叟不吾欺。  
呼兒具紙筆，醉語輒錄之。

其十五

去鄉三十年，風雨荒舊宅。  
惟存一束書，寄食无定迹。  
每用愧淵明，尙取禾三百。  
頎然六男子，粗可傳清白。  
于吾豈不多，何事復嘆息。